



Komunikadu Imprensa

28 Abril 2020

Selebrasaun Aniversáriu ba dala XIX: JSMP Lansa Relatóriu Institusionál no Tomada de Posse ba Diretora Ezekutiva foun JSMP

Iha 28 Abril 2020 nu'udar loron aniversáriu JSMP nian ba dala **XIX**, iha komemorasaun aniversáriu ida ne'e, JSMP mós sei lansa Relatóriu Institusionál no tomada de posse ba Diretora Ezekutiva Sra. Ana Paula Marçal bá período tinan haat husi Konsellu Diretiva JSMP, Sr. Joaquim da Costa Freitas. Enkuantu Sr. Casimiro dos Santos sei asume filafali nia knaar nu'udar Jestór Programa, ne'ebé tau matan ba jestaun programa, finansa no rekursu umanu.

“Mezmu iha situasaun Covid-19, JSMP kontinua ninia serbisu hodi aseguara justisa ba ema hotu, aleinde ne'e sei haree mós ba implementasaun no kumpri regra sira hosi Estadu Emerjénsia, JSMP mós nafatin aseguara prevensaun ba Covid-19”, dehan Joaquim da Costa Freitas, Prezidente Kosellu Diretivu ka Board JSMP.

Iha istória lideransa JSMP nian iha tempu naruk, sempre lidera hosi mane no foin primeiravés JSMP lidera husi feto. Mudansa ne'e halo bazeia ba planu susesaun/kaderizasaun hosi instituisaun desde 2015, ne'ebé fó fatin ba feto hodi bele asume. Agora dadaun, número feto ne'ebé mak kaer pozisaun xave iha JSMP hamutuk na'in haat no mane hamutuk na'in rua. Mudansa ne'e nu'udar rekuñesimentu ida ba kapasidade feto iha pozisaun estratéjiku iha instituisaun.

Iha aniversáriu JSMP nian tinan 2020 ne'e, la hanesan tinan sira kotuk. Iha tinan ida ne'e JSMP sei lansa de'it uluk Relatóriu Institusionál 2019 hodi apresenta susesu sira ne'ebé JSMP atinje iha tinan fiskál 2019 nian hodi komemora aniversáriu JSMP nian tanba impaktu husi surtu Covid-19 ne'ebé afeta globalmente. Relatóriu Observasaun Jerál ba Jusitsa (OJS) no Observasaun ba Parlamentu Nasionál 2019 sei lansa iha tempu badak iha tempu balun tuir mai.

“Susesu ne'ebé rejista iha relatóriu ne'e parte hosi kontribuisaun no serbisu maka'as hosi funsionáriu sira hotu nian, inklui parseiru sira JSMP nian. Ne'e duni, ha'u lori JSMP nia naran la haluha hato'o agradese wa'in ba parte hotu ne'ebé kontribui ba susesu boot ida ne'e, partikularmente doadór sira mak hanesan Embaixada Governu Australia ka DFAT iha Timor-Leste ne'ebé apoiu liuhosi ajénsia *Governance for Development (GfD)*, the

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77257466

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Asia Foundation (TAF), Governu Timor-Leste liuhosi Gabinete Apoiu Sosiedade Sivíl, Gabinete Primeiru Ministru, Governu Noruega liuhosi HIVOS no Friends Against Domestic Violence in Timor--Leste Inc no Embaixada Canada iha Jakarta-Indonezia”, dehan Casimiro dos Santos, Diretór Ezekutivu Interinu JSMP.

Relatoriu Institusionál ne’e rezumu JSMP nia atividade sira durante tinan 2019 ho finansimentu husi doador sira-nian inklui mós relata kooperasaun servisu JSMP ho organizasaun nasional no internasionál sira. Iha relatóriu ne’e mós JSMP deskreve apoiu finansimentu husi doador sira hodi justifika akuntabilidade ba públiku.

Aleinde ne’e iha relatóriu ne’e, JSMP mós deskreve katak iha tinan 2019, konge halo monitorizasaun ba kazu krime hamutuk 493 no kazu sivíl hamutuk 11 iha tribunál sira hotu. Iha setór lejizlativu nian, JSMP mós konge halo monitorizaun ba sesaun plenaria hamutuk 64 hosi total plenaria 80 no enkontru Komisaun A hamutuk 33.

Enkuantu parte advokasia nian, JSMP hakerek paraser no sumáriu analiza no peskiza lejizlativu hamutuk 10 no halo audénsia no hatama submisaun ba Parlamentu Nasionál hamutuk 6, inklui halo audénsia no hatama paraser ida ba Komisaun Reforma Lejizlativa. Aleinde ne’e, JSMP mós fornese formasaun ba comunidade rural hamutuk dala 22 no estudante sira iha eskola hamutuk dala 3. JSMP mós prodús sumáriu kazu 43, relatóriu temátika 1 no relatóriu anuál hamutuk 3, komunikadu imprensa 48, artigu ba jornal 96, programa rádiu 2, programa TV 4 no bulletin 2.

JSMP sei kontinua hametin relasaun ho parseria lokál no internasionál sira. JSMP espera katak ho sira-nia apoiu inklui doador sira nia apoiu, JSMP bele kontinua nia servisu iha futuru ho rezultadu no progresu ne’ebé di’ak no boot liu tan.

Relasiona ho surtu Covid-19, selebrasaun aniversáriu JSMP ba dala XIX, no tomada de posse refere, JSMP la konvida parseiru xave sira, Governu, Parlamentu, Tribunál, Doador sira, Sosiedade Sivíl no mídia. JSMP lansa deit nia relatóriu liu hosi *online* ne’ebé bele asesu iha JSMP nia website: www.jsmp.tl

Atu hetan informasun liutan bele kontaktu:

Casimiro dos Santos
Diretór Ezekutivu Interinu JSMP
Email: casimiro@jsmp.tl
Telefone: 7725466 | 3323883
Website: www.jsmp.tl